

史  
通  
訓  
故

史通訓故卷之九

覈才第三十一

夫史才之難其難甚矣晉令云國史之任委之著作  
每著作郎初至必撰名臣傳一人斯蓋察其所由苟  
非其才則不可叨居史任歷觀古之作者若蔡邕劉  
孝標徐陵劉炫之徒各自謂長於著書達於史體然  
侏儒一節而他事可知案伯喈於朔方上書謂宜廣  
班氏天文志夫天文之於漢史實附贅之尤甚者也  
必欲申以掎摭但當鋤而去之安可仍其過失而益  
其蕪累亦奚異觀河傾之患而不遏以隄防方欲疏

而導之用速懷襄之害述史如此將非練達者歟孝  
標持論析理誠爲絕倫而自敘一篇過爲煩碎山栖  
一志直論文章諒難以偶跡遷固比肩陳范者也孝  
穆在齊有志於梁史及還江左而書竟不成嗟乎以  
徐公文體而施諸史傳亦猶灞上兒戲異乎真將軍  
幸而量力不爲可謂自卜者審矣光伯以洪儒碩學  
而迤邐不遇其銳情自敘欲以垂示將來而言皆淺  
俗理無要害豈所謂誦詩三百雖多亦奚以爲者乎  
昔尼父有言文勝質則史蓋史者當時之文也然朴  
散淳銷時移世異文之與史皎然異轍故以張衡之

文而不閑於史以陳壽之史而不習於文其有賦述  
兩都詩裁八詠而能編次漢冊勒成宋典若斯人者  
其流幾何是以畧觀近代有齒跡文章而兼脩史傳  
其爲式也羅含謝客宛爲詩頌之文蕭繹江淹直成  
銘贊之序溫子昇尤喜複語盧思道雅好麗詞江總  
猖獗以沉迷庾信輕薄而流宕此其大較也然向之  
數子所撰者蓋不過偏記雜說小卷短書而已猶且  
乖濫躋駁一至於斯而况責之以刊勒一家彌綸一  
代使其始末圓備表裏無咎蓋亦難矣但自世重文  
藻詞宗麗淫於是沮誦失路靈均當軸每西省虛職

東觀佇才凡所拜授必推文士遂使握管懷鈎多無  
銓綜之識連章累牘罕逢微婉之言而舉俗共以爲  
能當時莫之敢侮假令其間有術同彪嶠才若班荀  
懷獨見之明負不刊之業而皆取窘於流俗見嗤於  
朋黨遂乃哺糟歠醪俯同妄作被褐懷王無由自陳  
此管仲所謂用君子而以小人參之害霸之道者昔  
傅玄有云觀孟堅漢書實命代奇作及與陳宗尹敏  
杜撫馬嚴撰中興紀傳其文曾不足觀豈拘於時乎  
不然何不類之甚者也是後劉珍朱穆盧植楊彪之  
徒又繼而成之豈亦各拘於時而不得自盡乎何其

益陋也嗟乎拘時之患其來尚矣斯則自古之所歎

豈獨當今者哉

校七字

後漢書蔡邕爲程璜等所陷徙朔方上書自陳奏其所著十意帝嘉其才高宥還本郡

梁書劉峻爲安成王戶曹叅軍以疾去遊東陽紫巖山築室居焉爲山栖志其文甚美又自序余嘗自比馮敬通而有同之者三異之者四

隋書劉炫字光伯河間景城人開皇中與王劼同脩國史後罷歸河間不得志乃自牧其大幸有四深恨有一後竟凍餒而死

史記文帝後六年匈奴大入邊以河南守周亞夫爲將軍軍細柳劉禮軍霸上徐厲軍棘門上自勞軍至霸上棘門直馳入至細柳持節始開壁門天子按轡徐行成禮而去曰嗟乎此真將軍矣向者棘門霸上如兒戲耳

金華志南齊隆昌元年太守沈約題八詩于玄暢樓後人因更曰八詠樓

羅府君別傳含字君章棗陽人桓宣武辟爲別駕

累遷散騎常侍

北齊書盧思道字子行才學兼著楊遵彥薦于朝

累遷散騎侍郎

陳書江總字德持考城人仕梁尚書僕射入陳轉

太子詹事陳亡入隋拜上開府

後漢書尹敏字幼季南陽堵陽人與班彪親善累

遷諫議大夫

後漢書杜撫字叔和犍為武陽人建初中為公車

令

後漢書馬嚴字威卿伏波將軍援兄子也歷官中

丞與班固等定建武注記

後漢書劉珍字秋孫南陽蔡陽人歷官謁者僕射

永寧元年鄧太后令與劉駒駘等作建武以來名

臣傳

後漢書朱穆字公叔暉之孫也歷官典州刺史徵

拜尚書卒

後漢書盧植字子幹涿郡人徵為議郎與蔡邕等

并在東觀續漢記

後漢書楊彪字文先賜之子也代朱雋為大尉黃

初中卒

序傳第三十二

蓋作者自敘其流出於中古案屈原離騷經其首章  
上陳氏族下列祖考先述厥生次顯名字自敘發跡  
實基於此降及司馬相如始以自敘爲傳然其所敘  
者但記自少及長立身行事而已逮於祖先所出則  
蔑爾無聞至馬遷又徵三閭之故事放文園之近作  
摸搯二家勒成一卷於是揚雄遵其舊轍班固酌其  
餘波自敘之篇實煩於代雖屬辭有異而茲體無易  
尋馬遷史記上自軒轅下窮漢武疆宇修闊道路綿  
長故其自敘始於氏出重黎終於身爲太史雖上下



馳騁終不越史記之年班固漢書止敘西京二百年  
事耳其自敘也則遠徵令尹起楚文王之世近錄賓  
戲當漢明帝之朝苞括所及踰於本書遠矣而後來  
敘傳非止一家競學孟堅從風而靡施於家譜猶或  
可通列於國史每見其失者矣然自敘之爲義也苟  
能隱已之短稱其所長斯言不謬卽爲實錄而相如  
自序乃記其客遊臨邛竊妻卓氏以春秋所諱持爲  
美談雖事或非虛而理無可取載之於傳不其愧乎  
又王充論衡之自紀也述其父祖不肖爲州閭所鄙  
而已答以瞽頑舜神鯀惡禹聖夫自敘而言家世固

當以揚名顯親爲主苟無其人闕之可也至若盛矜  
於已而厚辱其先此何異證父攘羊學子名毋必責  
以名教實三千之罪人也夫自媒自衒士女之醜行  
然則人莫我知君子所耻案孔氏論語有云十室之  
邑必有忠信不如丘之好學也又曰吾日三省吾身  
爲人謀而不忠乎與朋友交而不信乎又曰文王既  
沒文不在茲乎又曰昔者吾友嘗從事於斯矣則聖  
達立言也時亦揚露已才或託諷以見其情或巽辭  
以顯其跡終不盱衡自伐攘袂公言且命諸門人各  
見爾志由也不讓見嗤無禮歷觀揚雄已降其自敘

也始以誇尚爲宗至魏文帝傅玄陶梅葛洪之徒則  
又踰於此者矣何則身兼片善行有微能皆剖析具  
言一二必載豈所謂憲章前聖謙以自牧者歟又近  
古人倫喜稱閎閎其華門寒族百代無聞而駢角挺  
生一朝暴貴無不追述本系妄承先哲至若儀父振  
鐸並爲曹氏之初淳維李陵俱稱拓拔之始河南馬  
祖遷彪之說不同吳興沈先約炯之言有異斯皆不  
因真律無假寧楹直據經史自成矛盾則知楊姓之  
寓西蜀班門之雄朔野或冒纂伯僑或家傳熊繹恐  
自我作古失之彌遠者矣蓋諛祭非鬼神所不歆致

敬他親人斯悖德凡爲敘傳宜詳此理不知則闕亦

何傷乎

校九字

離騷帝高陽之苗裔兮朕皇考曰伯庸攝提貞于  
孟陬兮惟庚寅吾以降皇覽揆予於初度兮肇錫  
余以嘉名名余曰正則兮字余曰靈均  
前漢書司馬相如歸臨邛卓氏爲具召之臨邛令  
奏琴是時卓王孫有女文君新寡相如以琴心挑  
之文君夜亡奔相如遂相與馳歸成都久之復如  
臨邛或諫王孫乃分與文君錢百萬  
史記太史公自序昔顓頊命南正重以司天北正  
黎以司地其在周程伯休甫其後也當周宣王時  
失其守而爲司馬氏至司馬喜生談談爲太史公  
談卒三歲而遷爲太史令  
王充論衡自紀充細族孤門或啁之曰吾子何祖  
其先不載未嘗履墨塗出禮門吐論數千萬言何  
也答曰鮌惡禹聖叟惡舜神伯牛寢疾仲弓潔全  
云云

文帝典論自序首言初平董卓之亂次及張繡之

反乘馬得脫及與荀彧論射鄧展擊劍以至彈基之事無不縷陳

史記重黎氏世序天地索隱揆左氏重少昊之子黎顓項之胤二氏所出各別馬遷合而爲一故總云在周程伯休甫其後非也司馬彪序云南正黎後世爲司馬氏

南史沈約吳興武康人沈炯亦吳興武康人約自序云昔金天氏有裔子曰昧爲玄冥師生子臺駘能業其官顓頊嘉之封諸汾川其後四國沈熒蓐黃沈子國今汝南平輿沈亭是也其後因國爲氏云

前漢書楊雄其先出自有周伯僑者以支庶初食采于晉之楊因氏焉不知伯僑周何別也前漢書班氏之先與楚同姓令尹子文之後也子文初生棄于夢中而虎乳之楚人謂虎爲班其子以爲號秦之滅楚遷晉代之間因氏焉秦末有班壹避地樓煩以財雄邊故北方多以壹爲字者幽通賦云系高頊之玄胄今氏中葉之炳靈由凱風而蟬蛻兮雄朔野以颺聲固感東方朔揚雄自論以不遭蘇張范張之時作賓戲以自通

煩省第三十三

昔荀卿有云錄遠畧近則知史之詳畧不均其爲患

者久矣及于令昇

寶字令昇晉人

史議歷詆諸家而獨歸美

左傳云丘明能以三十卷之約括曩二百四十年之

事靡有遺斯蓋立言之高標著作之良模也又張

世偉

輔字世偉晉人

著班馬優劣論云遷敘三千年事五十

萬言固敘二百四十年事八十萬言是班不如馬也

然則自古論史之煩省者咸以左氏爲得史公爲次

孟堅爲非自魏晉已還年祚轉促而爲其國史亦不

減班書此則後來逾煩其失彌甚者矣余以爲近史

蕪累誠則有諸亦由古今不同勢使之然也輒求其  
本意畧而論之何者當春秋之時諸侯力爭各閉境  
相拒關梁不通其有吉凶大事見知於它國者或因  
假道而方聞或以同盟而始赴苟異於是則無得稱  
魯史所書實用此道至如秦燕之據有西北楚越之  
大啟東南地僻界於諸戎人罕通於上國故載其行  
事多有闕如且其書自宣成已前三紀而成一卷至  
昭襄已下數年而占一篇是知國阻隔者記載不詳  
年淺近者撰錄多備

杜預釋例云文公已上六公書  
日者二百四十九宣公已下亦

六公書日者四百三十二計年數畧同而日數加倍  
此亦久遠遺落不與近同也是則儒者注書已見之

矣

此丘明隨聞見而成傳何有故爲簡約者哉及漢

時之有天下也普天率土無思不服會計之吏歲奏  
於闕廷輜軒之使月馳於郡國作者居於京兆府徵  
事於四方用使夷夏必聞遠近無隔故漢氏之史所  
以倍增於春秋也降及東京作者彌衆至如名邦大  
都地富才良高門甲族世多髦俊邑老鄉賢競爲別  
錄家牒宗譜各成私傳於是筆削所採聞見益多此  
中興之史所以又廣於前漢也夫英賢所出何國而  
無書之則與日月長懸不書則與煙塵永滅是以謝  
承尤悉江左京洛事缺於三吳陳壽偏委蜀中巴梁



語詳於二國如宋齊受命梁陳握紀或地比禹貢一  
州或年方秦氏二世夫地之褊小年之窘迫遣使作  
者採訪易洽巨細無遺耆舊可詢隱諱咸露此小國  
之史所以不減於大邦也夫論史之煩省但當求其  
事有妄載苦於榛蕪言有闕書傷於簡畧斯則可矣  
必量世事之厚薄限篇第以多少理則不然且必謂  
丘明爲省也若介葛辨犧於牛鳴叔孫志夢於天壓  
楚人教晉以拔旆城者謳華以棄甲此而畢書豈得  
謂之省邪且必謂漢書爲煩也若武帝乞漿於栢父  
陳平獻計於天山長沙戲舞以請地楊僕怙寵而移

闕此而不錄豈得謂之煩邪由斯而言則史之煩省  
不中從可知矣又古今有殊澆淳不等帝堯則天稱  
大書惟一一篇周武觀兵孟津言成三誓伏犧止畫八  
卦文王加以繫辭俱爲大聖行事若一其豐儉不類  
懸隔如斯必以古方今持彼喻此如蚩尤黃帝交戰  
阪泉施於春秋則城濮鄆陵之事也有窮篡夏少康  
中興施於兩漢則王莽光武之事也夫差旣滅勾踐  
霸世施於東晉則桓玄宋祖之事也張儀馬錯爲秦  
開蜀施於三國則鄧艾鍾會之事也而往之所載其  
簡如彼今之所書其審如此若使後來同於往世限

一槩以成書將恐學者必詬其疎遺尤其率畧者矣

而議者苟嗤沈蕭之所記沈約字休文梁人著宋書蕭子顯著齊書

事倍于孫習孫盛字安國晉人著晉書習鑿齒字彥威亦著晉書華謝之所編

華嶠謝忱俱著漢史語煩於班馬不亦繆乎故曰論史之煩省

者但當求其事有妄載言有闕書斯可則矣必量世

事之厚薄限篇第以多少理則不然其斯之謂也校

春秋左傳魯宣公名倭一作委文公庶子臧太子惡而自立成公名黑肱宣公之子襄公名午成公

之子昭公名稠父襄公之子在位二十五年遜于齊

春秋左傳初叔孫穆子去魯及庚宗遇婦人使私為食適齊夢天壓已弗勝顛而見人黑而上僂號

之曰牛乃勝之既立庚宗之婦人獻以雉問其姓曰余子長矣召而問之則所夢也使為監

春秋左傳宣公十二年晉敗于邲晉人或以廣隊不能進楚人基之盼局少進馬還又基之拔旆投

衡乃出顧曰吾不如大國之數奔也春秋左傳宣公二年宋華元獲于鄭贖歸宋城莖元爲植巡功城者謳曰睥其目蟠其腹繫甲而復

于思于思棄甲復來通鑑漢武帝微行夜至栢谷就逆旅主人求漿主人翁曰無漿政有溺耳

史記高帝至平城爲匈奴所圍用陳平奇計使單于闕氏圍以得開其計秘世莫得聞注應劭曰陳平使畫工圖美女間遺闕氏云漢有美女如此今皇帝困阨欲獻之闕氏畏奪已寵因說匈奴解圍鄭氏曰以計鄙陋故秘不傳顏注以應氏之說出恒譚新論譚以意測之非記傳所說也

前漢書長沙定王發以景帝前二年立母微無寵故王卑濕貧國應劭注云定王以景帝後二年來朝有詔更前稱壽歌舞定王但張袖小舉手左右笑其拙上恠問之對曰臣國小地狹不足回旋帝乃以武陵零陵桂陽益之

前漢書武帝元鼎二年徙函谷關於新安注時樓

船將軍楊僕數有大功耻爲關外人上書乞徙東關以家財給其用度武帝意亦好廣濶於是徙去弘農三百里

春秋左傳僖公二十有八年夏四月戊辰晉侯次于城濮楚子王使鬬勃請戰已巳晉師陳于莘北胥臣蒙馬以虎皮先犯陳蔡楚右師潰狐毛以上軍夾攻子西楚左師潰楚師敗績

春秋左傳成公十六年楚子使公子成以汝陰之田求成于鄭鄭叛晉晉侯伐鄭楚子救之六月晉楚遇于鄢陵呂錡射楚王中目楚人宵遁晉入楚軍三日穀

春秋左傳有窮后羿因夏衰以代夏政後家衆殺之寒浞因羿室生澆及豷少康滅澆于過滅豷于戈復禹之績祀夏配天不失舊物

春秋左傳哀公元年吳王夫差敗越于夫椒遂入越夏三月越及吳平二十二年越滅吳使吳王居甬東辭曰孤老矣焉能事君乃縊

晉書桓玄矯詔自封楚王尋篡位劉裕等起義兵討誅之安帝反正

史記苴蜀相攻擊各來告急于秦惠王欲發兵伐

蜀而韓來侵秦惠王欲先伐韓後伐蜀未決張儀曰不如伐韓司馬錯以爲不如伐蜀完惠王從之卒起兵伐蜀取之遂定蜀貶蜀王更號爲侯而使陳莊相蜀

魏志鍾會字士季潁川長社人鄧艾字士則棘陽人司馬文王欲圖蜀惟會以爲可取景元四年乃命鄧艾等大舉傳檄巴蜀遂至綿竹蜀主降

### 門人封丘薛獻豐校

## 史通訓故卷之九終

史通訓故卷之十

雜述第三十四

昔在三墳五典春秋禱机卽上代帝王之書中古諸侯之記行諸歷代以爲格言其餘外傳則神農嘗藥厥有本草夏禹敷土實著山經世本辨姓著自周室家語載言傳諸孔氏是知偏記小說自成一家而能與正史參行其所從來尚矣爰及近古斯道漸煩史氏流別殊途並驚摧而爲論其流有十焉一曰偏記二曰小錄三曰逸事四曰瑣言五曰郡書六曰家史七曰別傳八曰雜記九曰地理十曰都邑簿夫皇王

受命有始有卒作者著述詳畧難均有權記當時不終一代若陸賈楚漢春秋樂資山陽公載記王韶晉安陸紀姚梁後畧此之謂偏記者也普天率土人物弘多求其行事罕能周悉則有獨舉所知編爲短部若戴逵竹林名士王粲漢末英雄蕭世誠懷舊志盧子行知己傳此之謂小錄者也國史之任記事記言視聽不該必有遺逸於是好奇之士補其所亡若和嶠汲冢記年葛洪西京雜記顧協瓊語謝綽拾遺此之謂逸事者也街談巷議時有可觀小說爲言猶賢於已故好事君子無所棄諸若劉義慶世說裴榮期



語林孔思尚語錄陽松玠談數此之謂瑣言者也汝  
穎竒士江漢英靈人物所生載光郡國故鄉人學者  
編而記之若圈稱陳留耆舊周裴汝南先賢陳壽益  
部耆舊虞預會稽典錄此之謂郡書者也高門華胄  
奕世載德才子承家思顯父母由是紀其先烈貽厥  
後來若揚雄家諫殷敬世傳孫氏譜記陸宗系曆此  
之謂家史者也賢士貞女類聚區分雖百行殊途而  
同歸於善則有取其所好各爲之錄若劉向列女梁  
鴻逸民趙採忠臣徐廣孝子此之謂別傳者也陰陽  
爲炭造化爲工流形賦象于何不育求其恠物有廣

異聞若祖台志恠干寶搜神劉義慶幽明劉敬叔異苑此之謂雜記者也九州土宇萬國山川物產殊宜風化異俗如各志其本國足以明此一方若盛弘之荊州記常璩華陽國志辛氏三秦羅含湘中此之謂地理書者也帝王桑梓列聖遺塵經始之制不常厥所苟能書其軌則可以龜鏡將來若潘岳關中陸機洛陽三輔黃圖建康宮殿此之謂都邑簿者也大抵偏記小錄之書皆記即日當時之事求諸國史最爲實錄然皆言多鄙朴事罕圓備終不能成其不刊永播來葉徒爲後生作者削藁之資焉逸事皆前史所

遺後人所記求諸異說爲益實多及妄者爲之則苟  
載傳聞而無銓擇由是真僞不別是非相亂如郭子  
橫之洞冥王子年之拾遺全構虛辭用驚愚俗此其  
爲弊之甚者也瑣言者多載當時辨對流俗嘲謔俾  
夫樞機者藉爲舌端談話者將爲口實及救者爲之  
則有詆訐相戲施諸祖宗褻狎鄙言出自牀第莫不  
昇之紀錄用爲雅言固以無益風規有傷名教者矣  
郡書者矜其鄉賢美其邦族施於本國頗得流行置  
於他方罕聞愛異其有如常璚之詳審劉昫之該博  
而能傳諸不朽見美來裔者蓋無幾焉家史者事惟

三族言止一門正可行於室家難以播於邦國且箕  
裘不墮則其錄雖存苟新構已亡則斯文亦喪者矣  
別傳者不出胸臆非由機杼徒以博採前史聚而成  
書其有足以新言加之別說者蓋不過十一而已如  
寡聞末學之流則深所嘉尚至於探幽索隱之士則  
無所取材雜記者若論神仙之道則服食鍊氣可以  
益壽延年語魑魅之途則福善禍淫可以懲惡勸善  
斯則可矣及謬者爲之則苟談恠異務述妖邪求諸  
弘益其義無取地理書者若朱贛所採浹於九州闕  
駟所書殫於四國斯則言皆雅正事無偏黨者矣其

有異於此者則人自以爲樂土家自以爲名都競美  
所居談過其實又城池舊跡山水得名皆傳諸委巷  
用爲故實鄙哉都邑簿者如宮闈陵廟街廛郭邑辨  
其規模明其制度斯則可矣及愚者爲之則煩而且  
濫博而無限故論棖棟則尺寸皆書記草木則根株  
必數務求詳審持此爲能遂使學者觀之瞶亂而難  
紀也於是考茲十品徵彼百家則史之雜名其流盡  
於此矣至於其間得失紛糅善惡相兼既難爲覩縷  
故粗陳梗槩且同自鄙無足譏焉又案子之將史本  
爲二說如呂氏淮南玄晏抱朴凡此諸子多以敘事

爲宗舉而論之抑亦史之雜也但以名目有異不復  
編於此科蓋語曰聚星之明不如一月之光歷觀自  
古作者著述多矣雖復門千戶萬波委雲集而言皆  
瑣碎事必褻殘固難以接光塵於五傳並輝烈於三  
史古人以比玉屑滿篋良有旨哉然則芻蕘之言明  
王必擇葑菲之體詩人不棄故學者有博聞舊事多  
識其物若不窺別錄不討異書專治周孔之章句直  
守遷固之紀傳亦何能自致於此乎且夫子有云多  
聞擇其善者而從之知之次也苟如是則書有非聖  
言多不經學者博聞蓋在擇之而已

校九字

魏志文帝既受禪黃初元年以河內之山陽邑奉漢帝爲山陽公奉漢正朔

晉書戴逵字安道譙國人以國子博士徵不就南史顧協字正禮吳人歷官散騎常侍

北史陽玠松北平人北齊秘書省正字

前漢書劉向賈逵趙衛之屬起微賤踰禮制以爲王教由內及外乃采詩書所載賢妃貞女及嬖孽亂亡者序次爲列女傳

後漢書梁鴻字伯鸞平陵人隱于霸陵山中仰慕前世高士爲四結以來二十四人作贊

晉書祖台之字元辰歷官侍中光祿大夫

後漢書郭憲字子橫汝南宋人光武時代張堪爲光祿著洞冥記序云漢武帝洞心于道教使冥跡之與昭然顯著故曰洞冥

晉書王嘉字子年著書百二十篇載前世奇詭之說凡十卷

北史闕駟字玄陰燉煌人樂安王丕引爲從事中郎撰十州志

春秋左傳襄公二十九年吳公子札來聘請觀于周樂自鄆以下無譏焉

隋書經籍志戴逵竹林七賢論二卷王粲漢末英  
雄記十卷梁元帝蕭繹懷舊志九卷盧思道知己  
傳一卷何嶠汲冢注一卷葛洪西京雜記二卷顧  
協嘖語十卷謝綽宋拾遺錄十卷劉義慶世說十  
卷裴榮期語林卷孔思尚宋齊語錄十卷陽松  
玠談藪二卷漢議郎圈稱陳留耆舊傳二卷魏周  
裴汝南先賢傳五卷晉陳壽益部耆舊傳十篇虞  
預會稽典錄二十四卷徐廣孝子傳三卷常璩華  
陽國志十二卷羅含湘中山水記三卷



辨職第三十五

夫設官分職佇勸課能欲使上無虛稱下無虛受其難矣哉昔漢文帝幸諸將營而目周亞夫爲真將軍嗟乎必於史職求其若斯乃爲難遇者矣史之爲務厥途有三焉何則彰善貶惡不避彊禦若晉之董狐齊之南史此其上也編次勒成鬱爲不朽若魯之丘明漢之子長此其次也高才博學名重一時若周之史佚楚之倚相此其下也苟三者並闕復何爲者哉昔魯叟之脩春秋也不藉三桓之勢漢臣之著史記也無假七貴之權而近古每有撰述必以大臣居首

案晉起居注載康帝詔盛稱著述任重理藉親覽遂以武陵王領秘書監尋武陵才非河獻識異淮南而輒以彼藩翰董斯邦籍求之稱職無聞焉爾既而齊撰國史和士開忽知唐修本草徐世勣監統夫使辟陽長信指撝南董之前周勃張飛彈壓桐雷之右斯亦恠矣大抵監史爲難斯乃尤者若使直若南史才如馬遷精勤不懈若揚子雲諳識故事若應仲遠兼斯具美督彼群才使載言記事藉爲模楷搦管操觚歸其隹的斯則可矣但今之從政則不然凡居斯職者必恩幸貴臣凡庸賤品飽食安步坐嘯畫諾若斯

而已矣夫人既不知善之爲善則亦不知惡之爲惡  
故凡所引進皆非其才或以勢利見升或以干祈致  
擢遂使當官効用江左以不樂爲謠拜職辨名洛中  
以不閑爲說言之可爲大噓可爲長歎也曾試論之  
世之從仕者若使之爲將也而才無韜畧使之爲吏  
也而術靡循良使之屬文也而匪閑於辭賦使之講  
學也而不習於經典斯則負乘致寇悔吝旋及雖五  
尺童兒猶知調笑者矣唯夫脩史者則不然或當官  
卒歲竟無刊述而人莫之知也或輒不自揆輕弄筆  
端而人莫之見也由斯而言彼史曹者崇局峻宇深

附九重雖地處禁中而人同方外可以養拙可以藏  
愚繡衣直指所不能繩強項申威所不能及斯固素  
食之窟宅尸祿之淵藪也凡有國有家者何事於斯  
職哉昔子貢欲去告朔之餼羊子曰爾愛其羊我愛  
其禮又語云雖無老成人尚有典刑觀歷代之置史  
臣有同嬉戲而竟不廢其職者蓋存夫愛禮愴彼典  
刑者乎昔丘明之脩傳也以避時難子長之立記也  
藏於名山班固之成書也出自家庭陳壽之爲志也  
創於私室然則古來賢雋立言垂後何必身居廨宇  
跡參僚屬而後成其事乎是以深識之士知其若斯

退居清淨杜門不出成其一家獨斷而已豈與夫冠

猴獻狀評議其得失者哉

校九字

晉書武陵王晞字道叔太興元年受封康帝建元初領秘書監

前漢書河間獻王德孝景帝子也好儒學被服造次必于儒者山東諸儒多從之游

北史和士開字彥通清都臨漳人以傾巧有寵于齊神武仕至左僕射武成時恒令與胡太后握槊

又出入卧内遂與太后亂後伏誅

唐書徐世勣字懋功曹州人李密起兵署勣為右武侯大將軍歸唐賜姓李氏歷官尚書左僕射

前漢書審食其以舍人初起從高祖三年呂后為項羽所得食其侍從後封辟陽侯

史記嫪毐與秦太后亂封長信侯予之山陽地史記周勃沛人高祖初起以中涓從後積功賜爵列侯食絳號為絳侯

蜀志張飛字益德涿郡人以積功封西鄉侯

荒史黃帝主醫藥之臣有岐伯雷公俞跗巫彭桐

君凡五人

後漢書獻帝始遷都于許舊章湮滅應劭乃綴集  
所聞著漢官禮儀故事凡朝廷制度百官典式多  
劭所立

自敘第三十六

予幼奉庭訓早遊文學年在紈綺便愛古文尚書每苦其辭艱瑣難爲諷讀雖屢逢捶撻而其業不成嘗聞家君爲諸兄講春秋左氏傳每廢書而聽逮講畢卽謂諸兄說之因竊歎曰若使書皆如此吾不復怠矣先君竒其意於是始授以左氏期年而講誦都畢于時年甫十有二矣所講雖未能深解而大義畧舉父兄欲令博觀義疏精此一經辭以獲麟已後未見其事乞且觀餘部以廣異聞次又讀史漢三國志旣欲知古今沿革曆數相承於是觸類而觀不假師訓

自漢中興已降迄乎皇家實錄年十有七而窺覽畧  
周其所讀書多因假貸雖部帙殘缺篇第有遺至於  
敘事之紀綱立言之梗槩亦粗知之矣但于時將求  
仕進兼習揣摩至於專心諸史我則未暇泊年登弱  
冠射策登朝於是思有餘閑獲遂本願旋遊京洛頗  
積歲年公私借書恣情披閱至如一代之史分爲數  
家其間雜記小書又競爲異說莫不鑽研穿鑿盡其  
利害加以自小觀書喜談名理其所悟者皆得諸衿  
腑非由染習故始在總角讀班謝兩漢便恠前書不  
應有古今人表後書宜爲更始立紀當時聞者共責



以童子何知而敢輕議前哲於是赧然自失無辭以對其後見張衡范曄集果以二史爲非其有暗合於古人者蓋不可勝紀始知流俗之士難與之言凡有異同蓄諸方寸及年以過立言悟日多常恨時無同好可與言者維東海徐堅晚與之遇相得甚歡雖古者伯牙之識鍾期管仲之知鮑叔不是過也復有永城朱敬則沛國劉允濟吳興薛謙光河南元行冲陳留吳兢壽春裴懷古亦以言議見許道術相知所有揚摧得盡懷抱每云德不孤必有鄰四海之內知我者不過數子而已矣昔仲尼以睿聖明哲天縱多能

覩史籍之繁文懼覽之者不一刪詩爲三百篇約史記以脩春秋讚易道以黜八索述職方以除九丘討論墳典斷自唐虞以訖于周其文不刊爲後王法自茲厥後史籍逾多苟非命世大才孰能刊正其失嗟予小子敢當此任其於史傳也嘗欲自班馬已降迄于姚李令狐顏孔諸書莫不因其舊義普加釐革但以無夫子之名而輒行夫子之事將恐驚愚俗取咎時人徒有其勞而莫之見賞所以每握管歎息遲迴者久之非欲之而不能實能之而不欲也旣朝廷有知意者遂以載筆見推由是三爲史臣再入東觀

朝爲著作佐郎轉左史今上初卽位又除著作長安  
中以本官兼脩國史會遷中書舍人暫罷其任神龍  
元年又以本官兼脩國史迄今不改今之史館卽古之東觀也每惟皇家受命多歷  
年所史官所編粗惟紀錄至於紀傳及志則皆未有  
其書長安年中會奉詔預脩唐史及今上卽位又勅  
撰則天大聖皇后實錄凡所著述常欲行其舊議而  
當時同作諸士及監脩貴臣每與其鑿枘相違齟齬  
難入故其所載削皆與俗沉浮雖自謂依違苟從然  
猶大爲史官所嫉嗟乎雖任當其職而吾道不行見  
用於時而美志不遂鬱快孤憤無以寄懷必寢而不  
言嘿而無述又恐歿世之後誰知予者故退而私撰

史通以見其志昔漢世劉安著書號曰淮南子其書  
牢籠天地博極古今上自太公下至商鞅其錯綜經  
緯自謂兼於數家無遺力矣然自淮南已後作者無  
絕必商榷而言則其流又衆蓋仲尼既歿微言不行  
史公著書是非多謬由是百家諸子詭說異辭務爲  
小辨破彼大道故揚雄法言生焉儒者之書博而寡  
要得其糟粕失其菁華而流俗鄙夫貴遠賤近傳茲  
牴牾自相欺惑故王充論衡生焉民者冥也冥然罔  
知率彼愚蒙墻面而視或訛音鄙句莫究本源或守  
株膠柱動多拘忌故應劭風俗通生焉五常異稟百

行殊軌能有兼偏知有長短苟隨才而任使則片善不遺必求備而後用則舉世莫可故劉劭人物志生焉夫開國承家立身立事一文一武或出或處雖賢愚壤隔善惡區分苟時無品藻則理難錯綜故陸景典語生焉詞人屬文其體非一譬甘辛殊味丹素異彩後來祖述識殊圓通家有詆訶人相倚據故劉勰文心生焉若史通之爲書也蓋傷當時載筆之士其道不純思欲辨其指歸殫其體統夫其書雖以史爲主而餘波所及上窮王道下挾人倫總括萬殊包吞千有自法言已降迄于文心而往以納諸胸中曾不

蕭芥者矣夫其爲義也有與奪焉有褒貶焉有諷刺  
焉其爲貫穿者深矣其爲網羅者密矣其所商畧者  
遠矣其所發明者多矣蓋談經者惡聞服杜之嗤論  
史者憎言班馬之失而此書多譏往哲喜述前非獲  
罪於時固其宜矣猶冀知音君子時有觀焉尼父有  
云罪我者春秋斯之謂也昔梁徵士劉孝標作敘傳  
其自比於馮敬通者有三而予輒不自睽亦竊比於  
揚子雲者有四焉何者揚雄嘗好雕蟲小伎老而悔  
其少作余幼喜詩賦而壯都不爲耻以文士得名期  
以述者自命其似一也揚雄草玄累年不就當時聞

者莫不哂其徒勞余撰史通亦屢移寒暑悠悠塵俗  
共以爲愚其似二也揚雄撰法言時人競尤其安故  
作解嘲以訓之余著史通見者亦互言其短故作釋  
蒙以拒之其似三也揚雄少爲范曄劉歆所重及聞  
其撰太玄經則嘲以恐蓋譖訕然劉范之重雄者蓋  
貴其文彩若長楊羽獵之流耳如太玄深奧難以探  
賸旣絕窺踰故加譏誚余初好文筆頗獲譽於當時  
晚談史傳遂減價於知己其似四也夫才唯下劣而  
跡類先賢是用銘之於心特以自慰抑猶有遺恨懼  
不似揚雄者有一焉何者雄之玄經始成雖爲當時

所賤而桓譚以爲數百年外其書必傳其後張衡陸  
績果以爲絕倫參聖夫以史通方諸太玄今之君山  
卽徐朱等數君是也後來張陸則未之知耳嗟乎倘  
使平子不出公紀不生將恐此書與糞土同捐烟燼  
俱滅後之識者無得而觀此予所以撫卷漣漣淚盡  
而繼之以血也

校十二字

唐書徐堅字元固湖州長城人開元中爲集賢院  
學士

列子伯牙鼓琴鍾子期善聽伯牙志在高山子期  
曰善哉乎鼓琴巍巍乎如太山志在流水子期曰  
善哉乎鼓琴蕩蕩乎如江河

史記管仲曰生我者父母知我者鮑子

唐書朱敬則字少連永城人則天時遷正諫大夫  
兼脩國史



唐書劉允濟字允濟河南鞏人其先出沛國劉瓛之六世孫也累遷著作郎

唐書元澹字行冲以字顯後魏常山王素蓮之後累遷通事舍人以糸出拓跋恨史無編年乃撰魏

典三十篇

唐書吳兢浚儀人神龍中遷右補闕居史職三十

年敘事簡要人用稱之

唐書裴懷古壽春人儀鳳中上書補下邳主簿累

遷御史

前漢書揚雄見諸子其知舛駁是非頗謬于經故

人時有問雄者常用法言應之撰此以象論語

後漢書應劭撰風俗通以辨物類名號什時俗嫌

疑文雖不典後世服其洽聞

魏志劉邵字孔才邯鄲人黃初中為尚書郎作人

物志以人才不同當以九徵八觀審察而任使之

凡十六篇

南史劉勰字彥和東莞莒人著文心雕龍十卷

前漢書揚雄用心于內於時人皆忽之惟劉歆及

范滂效焉而桓譚以為絕倫雄死嚴尤謂譚曰子

嘗稱揚雄書豈能傳于後世乎譚曰必傳顧君與

譚不及見也老聃著虛無之言後世好之者尚以爲過于五經今揚子之書文義至深而論不詭于聖人若使遭遇時君則必度越諸子矣吳志陸績字公紀吳人累加偏將軍雖有軍事著述不廢作渾天圖注易什玄皆傳于世後漢書張衡謂崔瑗曰吾觀太玄方知子雲妙極道數乃與五經相擬漢四百歲玄其興矣又陸績云平子云玄四百歲其興乎漢元迄今四百年矣其道大顯

門人祥符朱民俊校

史通訓故卷之十終

大梁楊國俊寫

史通訓故卷之十一

明河南王惟儉訓

外篇

史官建置第一

總十四條

夫人寓形天地其生也若蜉蝣之在世如白駒之過隙猶且耻當年而功不立疾沒世而名不聞上趙帝王下窮匹庶近則朝廷之士遠則山林之客諒其於功也名也莫不汲汲焉孜孜焉如是者何哉皆以圖不朽之事也何者而稱乎蓋書名竹帛而已向使世無竹帛時闕史官雖堯舜之與桀紂伊周之與莽

卓夷惠之與跖躋商冒之與曾閔俱一從物化墳土  
未乾則善惡不分妍媸永滅者矣苟史官不絕竹帛  
長存則其人已亡杳成空寂而其事如在皎同星漢  
用使後之學者坐披囊篋而神交萬古不出戶庭而  
窮覽千載見賢而思齊見不賢而內自省若乃春秋  
成而逆子懼南史至而賊臣書其記事載言也則如  
彼其勸善懲惡也又如此由斯而言則史之爲用其  
利甚博乃生人之急務爲國之要道有國有家者其  
可缺之哉故備陳其事編之於後

其一條  
校一字

蓋史之建官其來尚矣昔軒轅氏受命倉頡沮誦實

居其職至於三代其數漸繁案周官禮記有太史小史內史外史左史右史之名太史掌國之六典小史掌邦國之志內史掌書王命外史掌書使乎四方右史記言左史記事曲禮曰史載筆大事書之於策小事簡牘而已大戴禮曰太子既冠成人免於保傅則有司過之史韓詩外傳云摠法守職而不敢爲非者太史令也斯則史官之作肇自黃帝脩於周室名目既多職務咸異至於諸侯列國亦各有史官求其位號一同王者至如孔甲尹逸名重夏殷史佚倚相譽高周楚晉則伯騫司籍魯則丘明受經此竝歷代史

臣之可得言者降及戰國史氏無廢趙鞅晉之一大  
夫爾猶有直臣書過操簡筆於門下田文齊之一公  
子爾每坐對賓客侍史記於屏風至若秦趙二主澠  
池交會各命其御史書某年某月鼓瑟鼓缶此則春  
秋君舉必書之之義也然則官雖無關而書尚有遺  
故史臣等差莫辨其序案呂氏春秋曰夏太史終古  
見桀惑亂載其圖法出奔商商太史向攄見紂迷亂  
載其圖法出奔周晉太史屠黍見晉之亂亦以其圖  
法歸周又春秋晉齊太史書趙崔之弑鄭公孫黑強  
與於盟使太史書其名且曰七子昭二年晉韓宣子

來聘觀書於太史氏見易象與魯春秋曰周禮盡在  
魯矣然則諸史之任太史其最優乎至秦有天下太  
史令胡毋敬作博學章此則自夏迄秦斯職無改者  
矣漢興之世武帝又置太史公位在丞相上以司馬  
談爲之漢法天下計書先上太史副上丞相敘事如  
春秋及談卒子遷嗣遷卒宣帝以其官爲令行太史  
公文書而已尋自古太史之職雖以著述爲宗而兼  
掌曆象日月陰陽度數司馬遷旣歿後之續史記者  
若褚先生劉向馮商揚雄之徒並以別職來知史務  
於是太史之署非復記言之司故張衡單飈王立高

堂隆等其當官見稱唯知占候而已

校四字  
其二條

當王莽代漢改置柱下五史秩如御史聽事侍傍記  
跡言行蓋効古者動則左史書之此其義也

其三條

漢氏中興明帝以班固爲蘭臺令史詔撰光武本紀  
及諸列傳載記又楊子山爲郡上計吏獻所作哀牢  
傳爲帝所異徵詣蘭臺斯則蘭臺之職者蓋當時著  
述之所也自章和已後圖籍盛於東觀凡撰漢記相  
繼在乎其中而都謂著作竟無它稱

其四條

當魏太和中始置著作郎職隸中書其官卽周之左  
史也晉元康初又職隸秘書著作郎一人謂之大著



作專掌史任又置佐著作郎八人宋齊已來以佐名

施於作下

改佐著作郎爲著作佐郎

舊事佐郎職知博採正郎資

以草傳如正佐有失則秘監職司其憂其有才堪撰

述學綜文史雖居他官或兼領著作亦有雖爲秘書

監而仍領著作郎者若中朝之華嶠陳壽陸機束皙

江左之王隱虞預干寶孫盛宋之徐爰蘇寶生梁之

沈約裴子野斯竝史官之尤美著作之妙選也而齊

梁二代又置脩史學士陳氏因循無所變革若劉洸

謝吳顧野王許善心之類是也

校三字其五條

至若偏隅僭國夷狄僞朝求其史官亦有可言者案

蜀志稱王崇補東觀許蓋掌禮儀又郗正爲秘書郎  
廣求益部書籍斯則典校無闕屬辭有所矣而陳壽  
評云蜀不置史官者得非厚誣諸葛乎別有曲筆篇  
言之詳矣吳歸命時有左右二國史之職薛瑩爲其  
左華覈爲其右又周處自左國史遷東觀令以斯考  
察則其班秩可知

校四字  
其六條

僞漢嘉平初公師或以太中大夫領左國史撰其國  
君臣紀傳前凉張駿時劉慶遷儒林郎中常侍在東  
苑撰其國書蜀與西凉三朝記事委之門下南凉主  
烏孫初定霸基欲造國紀以其叅軍郎韶爲國紀祭

酒使撰錄時事自餘僞主多置著作官若前趙之和苞後燕之董統是也

其七條

元魏初稱制卽有史臣雜取它官不常厥職故如崔浩高閭之徒唯知著述而未列名號其後始於秘書置著作局正郎二人佐郎四人其佐叅史者不過一二而已普泰以來叅史稍替別置脩史局其職有六人當代都之時史臣每上奉王言下詢國俗兼取工於翻譯者來置史曹及洛京之末朝議又以爲國史當專任代人不宜歸之漢士於是以谷纂山偉更主文籍凡經二十餘年其事闕而不載斯蓋猶秉夷禮

有互鄉之風者焉

校五字  
其八條

高齊及周迄于隋氏其史官以大臣統領者謂之監  
脩國史自領則近循魏代遠効江南叅雜其間變通  
而已唯周建六官改著作之正郎爲上士佐郎爲下  
士名謚雖易而班秩不殊如魏收之擅名河朔柳虬  
之獨步關右王劭魏澹展効於開皇之朝諸葛穎劉  
炫宣功於大業之世亦各一時也

校二字  
其九條

暨皇家之建國也乃別置史館通籍禁門西京則與  
鸞渚爲鄰東都則與鳳池相接而館宇華麗酒饌豐  
厚得厠其流者實一時之美事至咸亨年以職司多

濫高宗喟然而稱曰朕甚惜焉乃命所司曲加推擇

如有居其職而闕其才者皆不得預於脩撰詔曰脩撰國史

義存典實自非操履忠正識量該通才學有聞方堪

斯任如聞近日已來但居此職即知脩撰非唯編輯

訛舛亦恐漏洩史事自今後宜遣史司精簡堪脩史

人灼然爲衆所推者錄名進內自餘雖居史職不得

輒聞見所脩史籍及由是史臣拜職多取外司著作

未行用國史等之事

一曹殆成虛設凡有筆削畢歸于餘館始自武德迄

乎長壽其間若李仁實以直辭見憚敬播以敘事推

工許敬宗之矯妄牛鳳及之狂惑此其善惡尤著者

也

校一字  
其十條

又案晉令著作郎掌起居集注撰錄諸言行勲伐舊

載史籍者元魏置起居令史每行幸讌會則在御左右紀錄帝言及賓客酬對後別置脩起居注二人多以餘官兼掌至隋以吏部散官及校書正字閑於述注者脩之納言監領其事煬帝以爲古有內史外史今既有著作宜立起居遂置起居舍人二員職隸中書省如庾自直崔瀼祖虞世南蔡允恭等咸居其職時謂得人唐氏因之又加置起居郎二員職與舍人同每天子臨軒侍立於玉階之下郎居其左舍人居其右人主有命則逼階延首而聽之退而編錄以爲起居注龍朔中改名左史右史今上卽位仍從國初

之號焉高祖太宗時有令狐德棻呂才蕭鈞褚遂良  
上官儀高宗則天時有李安期顧胤高智周張大素  
凌季友斯並當時得名朝廷所屬也夫起居注者編  
次甲子之書至於策命章奏封拜薨免莫不隨事記  
錄言惟詳審凡欲撰帝紀者皆因之以成功卽今爲  
載筆之別曹立言之貳職故畧述其事附於斯篇

其十一條  
校二字

又按詩邶風靜女之三章君子取其彤管夫彤管者  
女史記事規誨之所執也古者人君外朝則有國史  
內朝則有女史內之與外其任皆同故晉獻惑亂驪

姬夜泣床第之私房中之事不得掩焉楚昭王讌遊  
蔡姬許從孤死矣夫宴私而有書事之冊蓋受命者  
卽女史之流乎至漢武帝時有禁中起居注明德馬  
皇后撰明帝起居注凡斯著述似出宮中求其職司  
未聞位號隋世王劭上疏請依古法復置女史之班  
具錄內儀付于外省文帝不許遂不施行大抵自古  
史官其公革廢置如此夫仲尼脩春秋公羊高作傳  
漢魏之陸賈魚豢晉宋之張璠范曄雖身非史職而  
私撰國書若斯人者有異於是故不復詳而錄之



夫爲史之道其流有二何者書事記言出自當時之簡勒成刪定歸於後來之筆然則當時草創者資乎博聞實錄若董狐南史是也後來經始者貴乎雋識通才若班固陳壽是也必論其事業前後不同然相須而成其歸一揆

其十三條

觀夫周秦已往史官之取人其詳不可得而聞也至於漢魏已降則可得而言然多竊虛號有聲無實案劉曹二史皆當代所撰能成其事者蓋唯劉珍蔡邕王沉魚豢之徒耳而舊史載其同作非止一家如王逸阮籍亦預其列且叔師研尋章句儒生之腐者也

嗣宗沉湎麴蘖酒徒之狂者也斯豈能錯置時事裁  
成國典乎而近代趨競之士尤喜居於史職至於措  
辭下筆者十無一二焉既而書成繕寫則署名同獻  
爵賞既行則攘袂爭受遂使是非無准真偽相雜生  
則厚誣當時死則致惑來代而書之譜傳以爲美談  
載之碑碣增其壯觀既而自歷行事稱其所長則云  
某代著某書某年成某史加封若干戶獲賜若干段  
諸如此類往往而有遂使讀者皆以爲名實相符功賞  
相副昔魏帝有言舜禹之事吾知之矣此則効歟

春秋左傳楚靈王次于乾谿右尹子革侍左史倚相趨過王曰是良史也子善視之

說苑昔周舍事趙簡子立于門三日夜簡子使問之曰夫子將何以令我舍曰願爲諤諤之臣墨筆操牘司君之過而書之日有記月有效歲有得也簡子悅之

史記孟嘗君待客坐語而屏風後常有侍史主記君所與客語聞親戚居處客去孟嘗君已使使存問獻遺其親戚

史記秦王與趙惠王會于滹池飲酒酣請趙王鼓瑟秦御史前書曰某年月日秦王與趙王會飲令趙王鼓瑟藺相如前進瓶詭請秦王王不懌爲一擊瓶相如顧召趙御史書曰某年月日秦王爲趙王擊瓶

春秋左傳昭公元年鄭伯及其大夫盟于公孫段氏平虎公孫僑公孫段印段游吉駟帶私盟于閨門之外實薰隧公孫黑強與于盟使太史書其名且曰七子

魏志高堂隆字升平青龍中爲太史令其二條論衡楊終字子山爲郡上計吏見三府掾史爲哀

宋傳不能成歸郡作上之孝明奇之徵詣蘭臺

魏志太和明帝改元

晉書惠帝元康二年詔著作舊屬中書今秘書既

典文籍宜改爲秘書著作于是改隸秘書

晉書束皙字廣微陽平人歷官著作郎

隋書許善心字務本高陽北新城人入隋爲秘書

蜀志郤正字令先偃師人蜀秘書令史遷郎蜀平

隨後王入洛陽時論嘉之其六條

晉書嘉平僞漢劉聰政元

晉書公師或襄陵人善相見劉淵驚曰此人形貌

非常吾所未見也官至太中大夫其七條

北史山偉字仲才洛陽人領著作郎自崔浩高允

以還諸人相繼撰錄至其偉山偉等諂悅上黨王

天穆及爾朱隆以國史應代人脩緝是以偉等更

主文籍守舊而已自崔鴻死後二十許載時事蕩

然萬不記一史之遺闕偉之由也無谷纂或是其

儔之誤其八條

北史柳虬字仲盤河東人周文帝時領著作脩起

居注

北史魏澹字彥深鉅鹿下曲陽人隋高祖受禪遷著作郎

北史諸葛穎字漢建康人起家梁邵陵王參軍入隋遷著作郎其九條

唐書咸亨高宗改元武德高祖改元長壽武后改元

唐書李仁實魏州頓丘人歷官左史

唐書敬播河東人累遷著作郎兼脩國史與孔穎達等撰次隋史與令狐德棻撰晉書大抵凡例皆播所發也

唐書許敬宗字延族杭州新城人龍朔中爲右相唐書牛鳳及長壽中撰唐書自武德終弘道爲百有十卷其十條

隋書庾自直潁川人大業初授著作郎

唐書虞世南字伯施餘姚人隋大業中遷秘書郎入唐累官秘書監

唐書蔡允恭荊州江陵人仕隋爲起居舍人入唐官至太子洗馬

唐書呂才博州清平人累擢太常博士

唐書蕭鈞大保璠之從子也永徽中累遷弘文館

學士

唐書褚遂良錢塘人散騎常侍亮之子也歷官尚

書右僕射

唐書上官儀字游韶陝州人授弘文館學士遷秘

書郎

唐書李安期百藥之子也高宗時遷中書舍人自  
德材至安期三世掌制誥至孫義仲又爲中書舍

人

唐書顧胤吳人永徽中累遷起居郎兼脩國史  
唐書高智周晉陵人累官秘書郎弘文館學士

其十一條

詩邶風靜女靜女其變貽我彤管彤管有煇悅懌  
女美

國語優施教驪姬夜半而泣謂獻公曰君盍殺我  
無以一妾亂百姓公曰太子惠其民而不惠於其  
父乎驪姬曰君盍老而授之政彼得政而行其欲  
得其所索乃可釋君公曰不可爾勿憂吾將圖之  
列女傳越姬者勾踐之女昭王之姬也昭王燕遊  
蔡姬在左越姬參右乃顧謂二姬曰樂乎對曰樂  
王曰願與吾子生若此死若此蔡姬曰願生同樂

死同時王顧謂史書之蔡姬許從狐死矣其二  
後漢書王逸字叔師宜城人順帝時爲侍中注楚  
辭行于世  
晉書阮籍縱酒昏酣遺落世事聞步兵人善釀  
貯有美酒三百斛求爲步兵校尉其十四條

門人太康盧申校

史通訓故卷之十一終

史通訓故卷之十二

古今正史第二

總十八條

三墳五典

易曰上古結繩以理後世聖人易之以書契儒者云  
伏犧氏始畫八卦造書契以代結繩之政由是文籍  
生焉又曰伏犧神農黃帝之書謂之三墳言大道也  
少昊顓頊高辛唐虞之書謂之五典言常道也春秋  
傳載楚左史能讀三墳五典禮記曰外史掌三皇五  
帝之書由斯而言則墳典文義三五典策至於春秋  
之時猶大行於世爰及後世其書不傳惟唐虞已降



史通言古  
可得言者然自堯而往聖賢猶述求其一二髣髴存  
焉而後來諸子廣造奇說其語不經其書非聖故馬  
遷有言神農已前吾不知矣班固亦曰顓頊之事未  
可明也斯則墳典所記無得而稱者焉

校三字

尚書

堯舜相承已見墳典周監二代各有書籍至孔子討論其義刪爲尚書始自唐堯下終秦繆其言百篇而各爲之序屬秦爲不道坑儒禁學孔子之末孫曰孔惠壁藏其書漢室龍興旁求儒雅聞故秦博士伏勝能傳其業詔太常使掌固晁錯受焉時伏生年且百歲言不可曉口授其書纔二十九篇自是傳其學者有歐陽氏大小夏侯宣帝時復有河內女子得泰誓一篇獻之與伏生所誦合三十篇行之於世其篇所載年月不與序相符會又與左傳國語孟子所引泰

誓不同故漢魏諸儒

謂馬融鄭玄王肅也

咸疑其繆古文尚書

者即孔惠之所藏科斗之文字也魯恭壞孔子舊宅

始得之於壁中博士孔安國以校伏生所誦增多二

十五篇更以隸古字寫之編爲四十六卷司馬屢採

其事故遷多有古說安國又受詔爲之訓傳值武帝

末巫蠱事起經籍道息不獲奏上藏諸私家劉向取

校歐陽大小夏侯三家經文脫誤甚衆至於後漢孔

氏之本遂絕其有見於經典者諸儒皆謂之逸書

馬融

鄭玄杜預也

王肅亦注今文尚書而大興古文孔傳相類

或肅私見其本而獨秘之乎晉元帝時豫章內史梅

蹟始以孔傳奏上而缺舜典一篇乃取肅之堯典從  
慎徽以下分爲舜典以續之自是歐陽大小夏侯家  
等學馬融鄭玄王肅諸注廢而古文孔傳獨行列於  
學官永爲世範齊建武中吳興人姚方興采馬王之  
義以造孔傳舜典云於大航購得詣闕以獻舉朝集  
議咸以爲非

梁武帝時爲博士議曰孔敘稱伏生誤合五篇蓋文句相連所以或令舜典必

有粵若稽古伏生雖云昏耄何容由是遂不見用也及江陵版蕩其文入北中

原學者得而異之隋學士劉炫遂取此一篇列諸本

第故今人所習尚書舜典元出於姚者焉

校三字

前漢書歐陽生字和伯千乘人受尚書于伏生以授兒寬由是尚書世有歐陽氏學

前漢書夏侯勝其先夏侯都尉從濟南張生受尚書以傳族子始昌始昌傳勝勝傳從兄子建由是尚書有大小夏侯之學

前漢書魯恭王餘孝景程姬之子也初立爲淮陽王後徙王魯恭王好治宮室壞孔子舊宅以廣其宮於其壁中得古文經傳

南齊書建武齊明帝蕭鸞改元

春秋

當周室微弱諸侯力爭孔子應聘不遇自衛而歸乃與魯君子丘明觀書於太史氏因魯史記而作春秋上遵周公遺制下明將來之法自隱及哀十二公行事經成以授弟子弟子退而異言丘明恐失其真故論本事而爲傳明夫子不以空言說經也春秋所貶當世君臣其事實皆形於傳故隱其書而不宣所以免時難也及末世口說流行故有公羊穀梁鄒夾之傳鄒氏元師夾氏有錄無書故不顯於世漢興董仲舒公孫弘並治公羊其傳習者有嚴顏二家之學宣

帝即位聞衛太子私好穀梁乃召名儒蔡千秋蕭望之等大議殿中因置博士平帝初立左氏逮於後漢儒者數廷毀之會博士李封卒遂不復補和帝元興十一年鄭興父子奏請重立於學官至魏晉其書漸行而二傳亦廢今所用左氏本即杜預所注者

校四

前漢書顏注公羊子名高齊人穀梁子名喜魯人俱著春秋傳

史記公孫弘字季菑川國薛人武帝時爲丞相封平津侯

前漢書嚴彭祖字公子下邳人顏安樂字公孫薛人俱事畦孟孟弟子百餘人惟彭祖安樂質問疑義各持所見孟曰春秋之義在二子矣

前漢書衛子夫得幸生戾太子摯武帝詔太子受公羊春秋太子旣通復私問穀梁而善之宣帝史皇孫之子戾太子之孫也旣立聞衛太子好穀梁

乃詔諸儒議之由是穀梁之學大盛  
前漢書沛蔡千秋從魯榮廣受穀梁春秋爲學最  
篤宣帝召見使說經善之擢爲諫大夫  
前漢書蕭望之字長倩蘭陵人宣帝時詔望之等  
平公羊穀梁同異望之等十一人各以經誼對多  
從穀梁由是穀梁之學盛  
後漢書范滂以左氏淺末不宜立學陳元爭之與  
亦辨凡十餘上帝卒立左氏學太常選博士四人  
元爲第一帝以元新忿爭乃用其次司隸從事李  
封諸儒以左氏立議論謹諱公卿以下數廷爭之  
會李封卒左氏復廢  
後漢書鄭興字少贛開封人善左氏傳光武徵爲  
太中大夫子衆字仲師從父受左氏春秋以明經  
遷給事中



# 史記

又當春秋之世諸侯國自有史故孔子求衆家史記而得百二十國書如楚之書鄭之志魯之春秋魏之紀年此其可得言者左丘明既配經立傳又撰諸異同號曰外傳國語二十一篇斯蓋採書志等文非唯魯之史記而已楚漢之際有好事者錄自古帝王公侯卿大夫之世終乎秦末號曰世本十五篇春秋之後七雄並爭秦并諸侯則有戰國策三十三篇漢興太中大夫陸賈紀錄時功作楚漢春秋九篇孝武之世太史公司馬談欲錯綜古今勒成一史其意未就

而卒子遷乃述父遺志採左傳國語刪世本戰國策  
據楚漢列時事上自黃帝下訖麟趾作十二本紀十  
表八書三十世家七十列傳凡百三十篇都謂之史  
記厥協六經異傳整齊百家雜語藏諸名山副在京  
師以俟後聖君子至宣帝時遷外孫楊惲祖述其書  
遂宣布焉而十篇未成有錄而已

張晏漢書注云十篇  
歿後亡失此說非也

元成之間會稽褚先生更補其缺作武帝紀三王世  
家龜策日者等傳其龜策日者辭多鄙陋非遷本意  
也晉散騎常侍巴西譙周以遷書周秦已上或采家  
人諸子不專據正經於是作古史考二十五篇皆憑  
舊典以糺其繆今則與史記並行於代焉校十字  
前漢書楊惲華陰人母司馬遷女也惲始讀太史  
公記頗爲春秋以才能稱蜀志譙周字允南西  
充人後主時徙中散大夫蜀平入魏封陽城亭侯

# 前漢書

史記所書年止漢武太初已後闕而不錄其後劉向  
向子歆及諸好事者若馮商衛衡揚雄史岑梁審肆  
仁晉馮段肅金丹馮衍韋融蕭奮劉恂等相次撰續  
迄于哀平間猶名史記至建武中司徒掾班彪以爲  
其言鄙俗不足以踵前史又雄歆僞褒新莽誤後惑  
衆不當垂之後代者也於是採其舊事旁貫異聞作  
後傳六十五篇其子固以父所撰未盡一家乃起元  
高皇終乎王莽十有二世二百三十年綜其行事上  
下通洽爲漢書紀表志傳百篇其事未畢會有上書

云固私改作史記者有詔京兆收繫悉錄家書封上  
固弟超詣闕自陳明帝引見言固續父所作不敢改  
易舊書帝意乃解卽出固徵詣校書受詔卒業經二  
十餘載至章帝建初中乃成固後坐竇氏事卒於洛  
陽獄書頗散亂莫能綜理其妹曹大家博學能屬文  
奉詔校敘又選高才郎馬融等十人從大家授讀其  
八表及天文志等猶未克成多是待詔東觀馬續所  
作而古今人表不類本書始自漢末迄乎陳世爲其  
注解者凡二十五家至於專門受業與五經相亞初  
漢獻帝以固書文煩難省乃詔侍中荀悅依左氏傳

刪爲漢紀三十篇命秘書給紙筆經五年乃就其言  
簡要亦與本傳並行

校四字

前漢書藝文志馬融續太史公七篇注商陽陵人  
治易事五鹿充宗與孟博俱待詔頗序列傳未卒  
病死

後漢書馮衍字敬通杜陵人田邑既降帝怨衍等  
不時至遂見黜

前漢書班固爲實憲中護軍及憲敗固先坐免官  
初洛陽令种兢嘗出行固奴干其車騎吏推呼之  
奴醉罵兢畏憲不敢發而心銜之及實氏賓客皆  
逮考競因此捕固係死獄中

後漢書曹大家名昭字惠姬曹世叔之妻班彪之  
女也兄固著漢書未竟而卒和帝詔昭就東觀藏  
書閣踵而成之

後漢書馬嚴七子惟融續知名續字季則博觀羣  
書順帝時漢書始出多未能通者馬融從班昭受  
讀後詔融兄續繼昭成之

後漢書

在漢中興明帝始詔班固與睢陽令陳宗長陵令尹  
敏司隸從事孟冀作世祖本紀并撰功臣及新市平  
林公孫述事作列傳載記二十八篇自是以來春秋  
世亦以煥炳而忠臣義士莫之撰勒於是又詔史  
官謁者僕射劉珍及諫議大夫李尤雜作紀表名臣  
節士儒林外戚諸傳起自建武訖乎永初事業垂竟  
而珍等繼卒復命侍中伏無忌與諫議大夫黃景作  
諸王王子功臣恩澤侯表南單于西羌傳地理志至  
元嘉元年復令大中大夫邊韶大軍營司馬崔寔議

郎朱穆曹壽雜作孝穆崇二皇及順烈皇后傳又增  
外戚傳入安思等后儒林列傳入崔篆諸人寔壽又  
與議郎延篤雜作百官表順帝功臣孫程郭願及鄭  
衆蔡倫等傳凡百十有四篇號曰漢記熹平中光祿  
大夫馬日磾議郎蔡邕楊彪盧植著作東觀接續紀  
傳之可成者而邕別作朝會車服二志後坐事徙朔  
方上書求還續成十志會董卓作亂大駕西遷史臣  
廢棄舊文散逸及在許都楊彪頗存注記至於名賢  
君子自太初已下闕續魏黃初中唯著先賢表故記  
殘缺至晉不成太始中秘書丞司馬彪始討論衆說

綴其所聞起元光武終于孝獻錄世十二編年二百  
通綜上下旁引庶事爲紀志傳凡一十三篇號曰續  
漢書又散騎常侍華嶠刪定東觀記爲漢後書帝記  
十二皇后紀二三譜十典列傳七十總九十七篇其  
十典竟不成而卒自斯已後作者相繼爲編年者四  
族創紀傳者五家推其所長華氏居寡而遭晉室東  
徙三惟一存至宋宣城太守范曄乃廣集學徒窮覽  
舊籍刪煩補畧作後漢書凡十紀十志八十列傳合  
爲百篇會曄以罪被收其十志亦未成而死先是晉  
東陽太守袁宏抄撮漢氏後書依荀悅體著後漢紀



十三篇世言漢中興史者唯范曄二家而已校十五

後漢書李尤字伯仁廣漢人安帝時爲諫議大夫受詔與僕射劉珍等俱撰漢記

後漢書建武光武改元永初安帝改元

後漢書伏湛光武時徙封不其侯傳爵至玄孫無忌無忌博物多識桓帝時詔與黃景崔寔等共撰

漢記

後漢書元嘉桓帝改元

後漢書邊韶字孝先浚儀人桓帝時徵拜太中大夫

著作東觀

後漢書崔寔字子真涿郡安平人桓帝時爲郎

後漢書朱穆字公叔南陽宛人歷官侍御史

後漢書順烈梁皇后諱納大將軍商之女永建三

年選入宮爲貴人陽嘉元年立爲后冲帝立尊爲

皇太后

後漢書安思閔皇后諱姬滎陽人閔暢之女元初

元年選入宮二年立爲后後以濟陰王事遷之離

宮

後漢書崔篆王莽時爲郡文學徵詣公車投劾歸

莽復以爲建新大尹未幾稱疾去

後漢書孫程字稚卿涿郡新城人安帝時爲中黃

門以立濟陰王是爲順帝封浮陽侯

後漢書鄭衆字季產南陽犂人肅宗卽位拜小黃

門以誅竇憲遷大長秋後封鄉侯

後漢書蔡倫字敬仲桂陽人永平末給事宮掖後

封龍亭侯

後漢書熹平靈帝改元

三輔決錄馬日磾字翁叔融之族孫獻帝時官太

傅與蔡邕楊賜等校定石經

魏志黃初文帝改元

晉書太始武帝改元

### 三國志

魏史黃初太和中始命尚書衛覬繆襲草創紀傳累載不成又命侍中常璉應璩秘書王沉大將軍從事中郎阮籍司徒右長史孫資司隸校尉傅玄等復共撰定其後王沉獨就其業勒成魏書四十四卷其書多爲時諱殊非實錄吳大帝之季年始命太史令丁孚郎中項峻撰吳書峻孚俱非史才其文不足紀錄至少帝時更勅常曜周昭薛瑩梁廣華覈訪求往事相與記述並作之中推瑩爲首當歸命侯時廣昭先亡曜瑩徙黜史官久闕書遂無聞覈表請曜瑩續成

前史其後曜獨終其書定爲五十五卷至晉受命海  
內大同著作陳壽乃集三國史撰爲國志凡六十五  
篇夏侯湛時亦著魏書見壽所作便壞已草而罷及  
壽卒梁州大中正范頽表言國志明乎得失辭多勸  
誠有益風化願垂採錄於是詔下河南尹就家寫其  
書先是魏時京兆魚豢私撰魏畧事止明帝其後孫  
盛撰魏氏春秋王隱撰蜀記張勃撰吳錄異聞錯出  
其流竄多宋文帝以國志載事傷於簡畧乃命中書  
郎裴松之兼採衆書補注其闕由是世言三國之志  
者以裴注爲本焉

魏志衛覬字伯儒河東安邑人  
以才學稱魏國建  
拜侍中

魏志繆襲字熙伯蘭陵人  
歷官光祿勳  
魏志常誕字仲將京兆人  
歷官侍中

魏志應璩字休璉汝南人  
歷官散騎侍郎典著作  
文章敎錄孫該字公達  
任城人年二十上計  
召為郎中著魏書

吳志孫權謚大皇帝

吳志薛瑩字道言竹邑人  
孫皓立太子領少傅何  
定建議鑿聖谿以通江  
淮瑩督萬人往後以盤  
石難施功罷定誅皓追  
聖谿事下瑩獄徙廣州  
後召還為左國史

吳志華覈字永先武進人  
以文學入為秘府郎孫  
皓時遷東觀令領右國史

吳志孫皓以晉太康元年  
降詔曰孫皓窮迫歸降  
前詔待之以不死今皓  
垂至意猶愍之其賜號  
為歸命侯

## 晉書

晉史洛京時著作郎陸機始撰三祖紀佐著作郎束皙又撰十志會中朝喪亂其書不存先是歷陽令陳郡王銓有著述才每私錄晉書及功臣行狀未就而卒子隱博學多聞受父遺業西都事跡多所詳究過江爲著作郎受詔撰晉史爲其同僚虞預所斥坐事免官家貧無資書未遂就乃依征西將軍庾亮於武昌鎮亮給其紙墨由是獲成凡爲晉書八十九卷咸康六年始詣闕奏上隱雖好述作而辭拙才鈍其書編次有序者皆銓所修章句混漫者必隱所作時尚

書郎領國史千寶亦撰晉紀自宣訖愍七帝五十三  
年凡二十二卷其書簡畧直而能婉甚爲當時所稱  
晉江左史自鄧粲孫盛王韶之檀道鸞已下相次繼  
作遠則編記兩帝近則唯敘六朝至宋湘東大守何  
法盛始撰晉中興書勒成一家首尾該備齊隱士東  
莞臧榮緒又集東西二史合成一書皇家貞觀中有  
詔以前後史十有八家制作雖多未能盡善乃勅史  
官更加纂錄採正典與舊雜作說數十餘部兼引偽  
史十六國書爲記十志二十列傳七十載記三十并  
序例目錄合爲百三十二卷自是言晉史者皆棄其  
舊本競從新撰者焉 校八字

晉書咸康成帝改元

宋書王韶之字休泰偉之子也晉義熙中除著作

郎宋武帝受命加驍騎將軍南史臧榮緒東莞

嘗人純篤好學括東西晉爲一書紀志傳百一十卷

宋書

宋史元嘉中著作郎何承天草創紀傳自此以外悉委奉朝請山謙之補承天殘缺後又命裴松之續成國史松之尋卒史佐孫冲之表求別自創立爲一家之言孝建初又勅南臺侍御史蘇寶生續造諸傳元嘉名臣皆其所撰寶生被誅大明六年又命著作郎徐爰踵成前作爰因何孫山蘇所述勒爲一書其臧質魯爽王僧達諸傳又皆孝武自造而序事多虛難以取信自永光已後至禪讓十餘年中闕而不載至齊著作郎沈約更補綴所遺製成雜史自義熙肇號



終乎昇明三年爲紀十志三十列傳六十合百卷名曰宋書永明末其書既行河東裴子野更刪爲宋畧二十卷沈約見而歎曰吾所不逮也由是世之言宋史者以裴畧爲上沈書次之

校二字

宋書何承天東海剡人仕宋領著作佐郎撰國史南史蘇寶者名寶生本寒門有文義之美元嘉中立國子學爲毛詩助教

南史臧質字含文東莞莒人世祖卽位以質爲都督江州諸軍事後同義宣謀反伏誅

宋書魯爽小名女生扶風郿人世祖以爲都督豫州諸軍事後與義宣謀逆爲薛安都所誅

宋書王僧達瑯琊人爲始興王叅軍累遷中書令宋書元嘉文帝改元孝建大明俱孝武帝改元永

光廢帝改元晉書義熙晉安帝改元

宋書昇明宋順帝改元

南齊書永明齊武帝改元

齊書

齊史江淹始受詔著述以史之所難無出於志故先著其志以見其才沈約復著齊紀二十篇紀八志十一列傳四十合成五十九篇時奉朝請吳均亦表請撰齊史乞給起居注并群臣行狀有詔齊氏故事布在流俗聞見既多可自搜訪也均遂撰齊春秋三十篇其書稱梁帝爲齊明佐命帝惡其實詭一作燔之詔然其私本竟能與蕭氏所撰並傳於後校一字

梁書江淹字文通濟陽考城人齊高帝始置史館命淹掌之入梁爲散騎常侍

南史梁武帝諱衍姓蕭氏蘭陵中都里人齊鬱林失德明帝作諱將爲妄立計帝欲助齊明傾齊武

之嗣明帝知之每與帝謀明帝時封建陽縣男後受齊禪

### 梁書

梁史武帝時沈約與給事中周興嗣步兵校尉鮑行卿秘書監謝昊相承撰錄已有百篇值承聖淪沒並從焚蕩廬江何之元沛國劉璠以所聞見究其始末合撰梁典三十篇而紀傳之書未有其作陳祠部郎中姚察有志撰勒施功未周但既當朝務兼修國史至於陳亡其書不就

校五字

梁書周興嗣字思纂項郡人歷官員外郎

南史鮑行卿以博學稱爲臨川王錄事累遷中書舍人

梁書承聖元帝改元

南史姚察吳興人陳永定中累官吏部尚書陳亡入隋

## 陳書

陳史初有吳郡顧野王北地傳綽各爲撰史學士其武文二帝紀卽顧傳所脩太建初中書郎陸瓊續撰諸篇事傷煩雜姚察就加刪改粗有條貫及江東不守持以入關隋文帝常索梁陳事跡察具以所成每篇續奏而依違徃苒竟未絕筆皇家貞觀初其子思廉爲著作郎奉詔撰成二史於是憑其舊藁加以新錄彌歷九載方始畢功述爲梁書五十六卷陳書三十六卷今並行世焉

校九字

陳書顧野王字希馬吳人梁大通初除太學博士入陳歷撰史學士

陳書傳綽字宜事靈州人梁太清末南奔爲王琳  
記室琳亡陳文帝召爲撰史學士

南史陳高祖武帝諱霸先姓陳氏吳興長城下  
若里人受梁敬帝禪世祖文皇帝諱蒨字子華始  
興王之長子也武帝崩詔入繼大業太建宣帝改  
元

北史隋高祖文皇帝姓楊氏諱堅弘農華陰人漢  
六尉襲之十四世孫也受周靜帝禪

陳書陸瓊字伯玉吳郡人仕陳歷官吏部尚書  
唐書趙思謙本名簡以字行仁高爲漢王府參軍  
入唐爲弘文館學士

十六國春秋

十六國史前趙劉聰時領左國史公師或撰高祖本紀及功臣傳二十人甚得良史之體凌脩譖其訕謗先帝聰怒而誅之劉曜時平輿子和苞譏趙記十篇事止當年不終曜滅後趙石勒命其臣徐光宗歷傳暢郭惜等撰上黨國記起居注趙書其後又令王蘭陳宴程陰徐機等相次撰述至石虎並令刊削使勒功業不傳其後燕太傅長史田融宋尚書庫部郎郭仲產北中郎叅軍王度追撰石事集鄴都記趙記等書前燕有起居注杜輔全錄以爲燕紀後燕建興元

年董統受詔草創後書著本紀并佐命功臣王公列傳合三十卷慕容垂稱其敘事富贍足成一家之言但褒述過美有慙董史之直其後申秀范享各取前後二燕合成一史南燕有趙郡王景暉嘗事德超撰二主起居注超亡仕於馮氏官至中書令仍撰南燕錄六卷蜀初號曰成後改稱漢李勢散騎常侍常璩撰漢書十卷後入晉秘閣改爲蜀李書璩又撰華陽國志具記李氏興滅前涼張駿十五年命其西曹邊瀏集内外事以付秀才索綏作涼國春秋五十卷又張重華護軍叅軍劉慶在東苑專修國史二十餘年

著涼記十二卷建康太守索暉從事中郎劉昞又各著涼書前秦史官初有趙淵車敬梁熙韋譚相繼著述符堅嘗取而觀之見苟太后幸李威事怒而焚滅其本後著作郎董誼追錄舊語十不一存及宋武帝入關曾訪秦國事又命梁州刺史吉翰問諸仇池並無所獲先是秦秘書郎趙整叅撰國史值秦滅隱於商洛山著書不輟有馮翊車頻助其經費整卒翰乃啟頻纂成其書以元嘉九年起至二十八年方罷定爲三卷而年月失次首尾不倫河東裴景仁又正其訛僻刪爲秦記十一篇後秦扶風馬僧虔河東衛隆



景並著秦史及姚氏之滅殘缺者多泓從弟和都仕  
魏爲左民尚書又追撰秦紀十卷夏天水趙思群北  
地張淵於真興承光世並受命著其國書及統萬之  
亡多見焚燒西涼與西秦北燕其史或當代所書或  
他邦所錄段龜龍記呂氏宗欽記禿髮氏韓顯宗記  
呂馮氏唯此三者可知自餘不詳誰作魏世黃門侍  
郎崔鴻乃考覈衆家辨其同異除煩補闕錯綜綱紀  
易其國書曰錄正紀曰傳都謂之十六國春秋鴻始  
以景明之初求諸國逸史逮至始元年鳩集稽備而  
猶闕蜀事不果成書推求十有五年始於江東購獲

乃增其篇目勒爲十卷鴻歿後永安中其子繕寫奏

上請藏諸秘閣由是僞史宣布大行於時校十八字

晉書載記前趙劉淵字元海冒頓之後以懷帝永嘉四年僭位至曜三世凡二十七年以成帝咸和四年滅

後趙石勒字世龍武鄉羯人勒以成帝咸和三年

僭立二主四子凡二十三年以穆帝永嘉五年滅

前燕慕容廆鮮卑人始廆以武帝六年稱公至皝

四世凡八十五年以海西公太和五年滅

後燕慕容垂以太元八年僭位改元建興傳至熙

滅

南燕慕容德以安帝隆安四年僭位至超二世滅

蜀李特巴西宕渠人子雄僭號國號成至李勢嗣

位改曰漢始特以惠帝太安元年起兵至勢六世

凡四十六年以穆帝永嘉三年爲桓溫所滅

前凉張駿字公庭是之子也建興四年封霸城侯

自執爲凉州至天錫凡九世七十六年爲苻堅滅

前秦苻健字建業洪第三子也健以穆帝七年僭

立至苻登五世四十四年以孝武太元十九年滅苻堅字永固雄之子也初堅母少寡將軍李威有辟陽之寵史官載之至是堅收起居注觀之見其事慚怒乃焚其書檢史官將加其罪會趙泉車敬等已死乃止堅後為姚萇所執縊于新平佛寺後秦姚萇字景茂以孝武太元九年僭立至弘三世凡三十二年以安帝義熙十三年為劉裕所滅夏赫運勃勃字屈子匈奴右賢王去卑之後僭位改元真興子昌改元承光始勃勃以安帝義熙二年僭位至昌二世凡二十六年為魏所滅西涼李暠字玄盛隴西成紀人暠以安帝隆安四年立至宋少帝景平元年滅凡二十四年西秦乞伏國仁隴西鮮卑人國仁以孝武太元十年僭位至慕末四世凡四十六年為赫連定所滅後涼呂光畧陽氏人以孝武太元十二年定涼州十五年僭位傳至隆以安帝元興三年滅凡十有三年

北燕馮跋字文起信都人跋以孝武太元二十年僭位至弘二世凡二十八年滅魏書景明至始魏主恪改元永安魏莊帝改元

## 後魏書

元魏史道武時始令鄧淵著國記爲十卷而條例未成暨乎明元廢而不述神麌二年又詔集諸文士崔浩浩弟覽高閭鄧穎晁維范亨黃輔等撰國書爲十卷又特命浩總監史任務從實錄復以中書郎高允散騎侍郎張偉並叅著作續成前史書敘述國事無隱惡而刊石寫之以示行路浩坐此夷三族同作死者百二十八人自是遂廢史官至文成帝和平元年始復其職而以高允典著作脩國記九年已九十手目俱衰時有校書郎中劉模長於緝綴乃令執筆而

口占授之如是者五六歲所成篇卷模有力焉初國  
記自鄧崔以下皆相承作編年體至孝文太和十一  
年詔秘書丞李彪著作郎崔光始分爲紀傳異科宣  
武時命邢巒追撰孝文起居注旣而崔光遵業補續  
下訖孝明之世溫子昇復脩孝武紀濟陰王暉業撰  
辨宗室錄魏史官私所撰盡於斯矣齊天寶二年勅  
秘書監魏收博採舊聞勒成一史又令刁柔辛元植  
方延祐睦仲讓裴昂之高孝幹等助其編次收所取  
史官懼相凌忽故刀辛諸子並乏史才唯以髣髴學  
流憑附得進於是大徵百家譜狀斟酌以成魏書上

自道武下終孝靜紀傳與志凡百三十卷收諂齊氏  
於魏室多不平既黨北朝又厚誣江左性憎勝已喜  
念舊惡甲門盛德與之有怨者莫不被以醜言沒其  
善事遷怒所至毀及高曾書成始奏詔收於尚書省  
與諸家論討前後列訴者百有餘人時尚書令楊遵  
彥一代貴臣勢傾朝野收撰其家傳甚美是以深被  
黨援諸訟史者皆獲重罰或斃於獄中群怨謗聲不  
息孝昭世勅收更加研審然後宣布於外書成嘗訪  
諸群臣猶云不實又令治改其所變易甚多由是世  
薄其書號爲穢史至隋開皇勅著作郎魏澹與顏之

推辛德源更撰魏書矯正收失澹以西魏爲真東魏  
爲僞故文恭列紀孝靜稱傳合紀傳論例摠九十二  
篇煬帝以澹書猶未能善又勅左僕射楊素別撰學  
士潘徽褚亮歐陽詢等佐之會素薨而止今世稱魏  
史者猶以收本爲主焉

校九字

魏書太祖道武帝諱珽獻明帝之子太宗明元皇  
帝諱嗣道武之長子也世祖太武皇帝諱燾明元  
之長子也改元神麤高宗文成皇帝諱濬景穆皇  
帝之長子也改元和平高祖孝文皇帝諱宏獻文  
帝之長子也改元太和世宗宣武皇帝諱恪孝文  
帝之第二子也肅宗孝明皇帝諱詡宣武帝之弟  
二子也孝靜皇帝諱善見清河王亶之子也出  
帝平陽王脩爲斛斯椿等迫脅出于長安是爲西  
魏孝靜帝仍都洛是爲東魏  
北史崔浩弟簡字仲亮一名覽道武初歷中書侍

郎參著作事

北史高閭字閭士漁陽雍奴人和平末仕中書侍

郎與高允齊名時稱二高

魏書高允字伯恭勃海脩人頗著作郎

魏書李彪字道回頓丘人魏孝文初為秘書丞

北史崔光清河人本名孝伯字長仁孝文賜名焉

仕著作郎

北史邢巒字洪賓河間鄭人累遷中書侍郎

北史溫子昇字鵬舉其先太原人祖避難家齊陰

孝莊時為主客郎中

北史刁柔字子溫解巾司空行參軍累遷國子博

士

北史辛元植德源之從祖兄也齊天保中歷位北海太守

北史楊愔字遵彥華陰人仕至尚書右僕射

北史開皇隋文帝改元

北齊書顏之推字介卿邢人為梁湘東王常侍自

齊入周至隋開皇召為文學

北史辛德源字孝基隴西人入隋牛弘以德源才

學奏與王劭同脩國史



北史潘徽字伯彥吳郡人入隋晉王廣引爲楊州  
博士帝嗣位令與褚亮等撰魏書

唐書褚亮字希明錢塘人太宗起文學館亮爲學  
士

唐書歐陽詢字信本臨湘人仕隋爲太常博士入  
唐貞觀中爲太子率更令

## 北齊書

高齊史天統初太常少卿祖孝徵述獻武起居名曰黃初傳天錄時中書侍郎陸元規常從文宣征討著皇帝實錄惟記行師不載它事自武平後史官陽休之杜臺卿祖崇儒崔子發等相繼注記逮於齊滅隋秘書監王劭內令史李德林並少仕鄴中多識故事王乃憑述起居注廣以異聞造編年書號曰齊志十有六卷其序云二十卷今世間傳者唯十六卷焉李在齊預脩國史創紀傳書二十七卷至開皇初奉詔續撰增多齊史三十八篇已上送官藏之秘府皇家貞觀初勅其子中書

舍人百藥仍其舊錄雜採它書演爲五十卷今之言

齊史者唯王李二家云

校二字

北齊高祖高歡以武定五年薨謚獻武王天統元年改謚神武皇帝子洋受魏禪國號齊是爲顯祖文宣皇帝俊王緯武成帝之長子改元天統又改武平

北齊書祖珽字孝徵瑩之子也起家秘書郎後王時佐于陸豈拜尚書左僕射

北齊書陽休之字子烈無終人仕魏黃門侍郎入齊遷尚書

唐書貞觀太宗改元

唐書李百藥字重規德林之子也仕隋爲通事舍人入唐拜中書舍人

後周書

宇文周史大統年有秘書丞柳虬兼領著作直辭正  
色事有可稱至隋開皇中秘書監牛弘追撰周紀十  
有八篇畧敘紀綱仍皆抵牾皇家貞觀初勅秘書丞  
令狐德棻秘書郎岑文本共加脩緝定爲周書五十  
卷

校二字

北史周節孝閔皇帝宇文覺受西魏禪國號周  
北史西魏孝武帝崩南陽王寶炬立是爲文帝改  
元大統  
唐書岑文本字景仁南陽人貞觀初擢中書舍人

隋書

隋史當開皇仁壽時王劭爲書八十卷以類相從定其篇目至於編年紀傳並闕其體煬帝世唯有王胄等所脩大業起居注及江都之禍仍多散逸皇家貞觀初勅中書侍郎顏師古給事中孔穎達共撰成隋書五十五卷與新撰周史並行於時初太宗以梁陳及齊周隋氏並未有書仍命學士分脩事具於上仍使秘書監魏徵摠知其務凡有讚論徵多預焉始以貞觀三年創造至十八年方就

唯思廉貞觀二年起姚功多於諸史一歲

合爲五代紀傳并目錄凡二百五十二卷書成下於

史閣唯有十志斷爲三十卷尋擬續奏未有其文又  
詔左僕射于志寧太史令李淳風著作郎常安仁符  
璽郎李延壽同撰其先撰史人唯令狐德棻重預其  
事太宗崩後刊勒始成其篇第雖編入隋書其實別  
行俗呼爲五代史志

校四字

隋書開皇仁壽俱文帝改元大業煬帝改元  
北史王肅字承基瑯邪人隋大業初爲著作郎

唐書顏師古字籀其先瑯邪人祖之推自齊入周  
遂居關中師古貞觀中遷秘書監

唐書孔穎達字仲達衛水人太宗引爲弘文館學  
士

唐書魏徵字玄成鉅鹿人初爲隱太子洗馬後遷  
秘書監

唐書于志寧字仲謚高陵人武德中兼文學館學  
士

唐書李淳風岐州雍人與諸儒脩書遷太史令

## 唐書

惟大唐之受命也義寧武德間工部尚書溫大雅首  
撰創業起居注三篇自是司空房玄齡給事中許敬  
宗著作佐郎敬播相與自立編年體號爲實錄迄乎  
三帝世有其書貞觀初姚思廉始撰紀傳粗成三十  
卷至顯慶元年太尉長孫無忌與于志寧令狐德棻  
著作郎劉胤之楊仁卿起居郎顧胤等因其舊作綴  
以後事復爲五十卷雖云繁雜時有可觀龍朔中敬  
宗又以太子少卿摠統史任更增前作混成百卷如  
高宗本紀及永徽名臣四夷等傳多是其所造又起



草十志未半而終敬宗所作紀傳或曲希時旨或猥  
釋私憾凡有毀譽多非實錄必方諸魏伯起亦猶張  
衡之蔡邕焉其後左史李仁寶續撰于志寧許敬宗

李義府等傳載言紀事見推直筆惜其短世

一作功

業未終至長壽中春官侍郎牛鳳及又斷自武德終  
于弘道撰爲唐書百有十卷鳳及以暗聾不才而輒

議一代大典凡所纂錄皆素責私家行狀而世人敘

事罕能自遠

一作達

或言皆比興全類咏諠或語多鄙

樸實同文案而摠入編次了無釐革其有出自胸臆

申其機杼發言則嗤鄙恠誕敘事則參差倒錯故閱

其篇第豈謂可觀披其章句不識所以既而悉收姚  
許諸本欲使其書獨行由是皇家舊事殘缺殆盡長  
安中余與正諫大夫朱敬則司封郎中徐堅左拾遺  
吳兢奉詔更撰唐書勒成八十卷神龍元年又與兢  
等重脩則天實錄編爲三十卷夫舊史之壞其亂如  
繩錯綜艱難期月方畢雖言無可擇事多遺恨庶將  
來削藁猶有憑焉大抵自古史臣撰錄其梗槩如此  
蓋屬詞比事以月繫年爲史氏之根本作生人之耳  
目者畧盡於斯矣自餘偏記小說則不暇具而論之

北史義寧隋恭帝改元

校十字

唐書武德唐高祖改元

唐書溫大雅字彥弘并州人隱太子將爲亂秦王

表大雅鎮洛陽

唐書房玄齡字喬臨淄人仕中書令

唐書顯慶永徽龍朔弘道俱高宗改元

唐書長孫無忌字機輔洛陽人高宗即位拜太尉

唐書李義府其先瀛州人後家于永太貞觀中拜

太子舍人

唐書長壽武則天改元

弟惟讓校

史通訓故卷之十二終